

BARBARIA.

*Regio.
Unde dicta.
Situs.*

Soli fertilis.

*Animalium va-
ritas.*

IN Africa, quam nos secundam cum Ptolemæo Orbis Partem fecimus, primo se offert loco *Barbaria* nobilissima Africæ regio. Ea nomen accepit vel a murmure inconcinno Incolarum, Arabibus dicto *Barbar*, eo quod Numidarum sermo. Arabibus talis videatur : vel a frequentibus desertis. *Bar* enim eorum lingua desertum sonat. Ab Ægypto ad Fretum usque Gaditanum pertinet, complectiturq; Mauritaniam utramque, Tingitanam videlicet & Cæsariensem, Africam proprie dictam, Cyrenaicam, Marmaricam, cum Libya exteriore. Statuunt illi recentiores Africæ Scriptores ab ortu Solis Marmaricæ (quæ hodie *Barcha* dicitur) deserta ad Montis usque Atlantis partem hodie *Meis* vocatam, quæ pars a Strabone forte sub nomine *Aspis* describitur : huncque Montem Atlantem (secundum ejus ab Oriente in Occidentem ad Mare usque, quod ab eo Atlanticum nuncupatur, longitudinem) a Meridionali plaga habet : ab Occidente ipsum Mare Atlanticum : Septentrionale vero latus mare Mediterraneum lambit. Aer & Coeli qualitas hujus Regionis varia. Vere Cælum mite, clemens, serenum; Æstate æstus vehementissimi, inprimis Junio & Iulio, mensibus; Autumno calor remissior : Hieme frigus vehementius, potissimum circa Decembrem & Iannuarium, sed matutino dumtaxat tempore, adeo ut nemo ob frigus ad ignem accedere cogatur. Autumni finis, totaque Hiems, bonaque Veris pars, impetuosus plena ventis. Quin & grandinibus, fulguribus & tonitruis horridis interdum vexatur : neque deest aliquibus in locis Nix copiosa. Ager Daçylorum, Malorumque Punicorum feracissimus : sed Frumenti non adeo fertilis : unde ejus Incolæ magna ex parte panem conficiunt hordeaceum. Fructus alios profert magna copia, Cerasa, Ficus, Poma, Pira, Pruna, Mala Persica, Armenica, Cydonia, Olivas, & similes. Abundat Oleo, Melle, Saccharo. Multijugis item Armentorum, Pecudum atque Ferarum generibus. Alit enim hæc regio Dracones, Elephantes, Capreas, Bubalos, & similia Animalia : item Leones, ac Pardales : habet & Mustelas Felibus pares ac similes, excepta rictus eminentia : Simiarum quoq; maximam multitudinē. Coluerunt hanc Regionē primum *Phœnici* Coloni, aliiq; qui ex Asia aut Ægypto eo devenerunt : Postea paruit *Romanis*, tū *Græcis Imperatoribus*, deinde *Vandalis*, *Saracenis*, *Arabibus* : nunc partim *Turcæ* subest, partim proprio *Seriffæ* : *Hispaniarum* quoq; *Rex* Arces quasdā in ea possidet. Regna omnino quatuor sunt *Marocci*, *Fessæ*, *Telesinū Tunetani*, quibus nonnulli *Barcæ* addunt. De duobus prioribus Marocci & Fessæ sequētib; Tabulis agetur, de reliquis hic agamus. *Telesinum* regnū quod vocant *Tremisen*, est *Mauritania Cæsariensis*. Longitudo